

李文襄公別錄

李文襄公別錄卷之二

行間紀畧

咨提督酌議通省增兵

咨江西巡撫添兵設塘

咨江南督撫提固防沿海

咨覆提督調守分水仙霞二關

咨將軍轉移副都統飛據仙霞堵禦

咨副都統犒賞滿漢甲兵

咨提督會商方畧

咨提督赴省會商堵禦衢州

咨江南總督調發滿兵赴浙應援

咨京口將軍迅發滿漢官兵赴浙應援

咨巡撫撥發官兵防守埭頭

密咨福建海澄公提督

咨提督統兵赴援瑞安

咨催提督統兵赴瑞

咨催提督赴甌

咨覆提督調發官兵

咨覆巡撫酌籌大兵糧餉

咨巡撫催解草料

咨覆巡撫已發龍游防剿官兵

咨覆將軍巡撫已發援處官兵

咨江西督撫提督會剿岐界賊寇

咨覆提督援台事宜

咨商巡撫發兵援嚴

咨覆巡撫各路援兵難撤

咨覆提督滿師仍駐金華

咨督餉侍郎巡撫籌酌運糧船隻

咨巡撫畱兵協防嚴屬

咨江南總督查取韓斌家屬

咨提督犒賞官兵

咨會福建總督發兵赴常夾剿

咨江南總督知照韓斌原籍

咨江西督撫發兵夾擊潰賊

咨督餉侍郎巡撫調兵至衛

咨江南督撫發兵分路剿賊

咨江西督撫委員整理新復地方

咨會將軍禁旗兵攜帶難民婦女

咨覆將軍再諭旗兵給還難民子女

咨覆水師提督湖頭渡哨船

李文襄公別錄卷二

男 鍾麟編次

咨提督酌議通省增兵

康熙十三年正月

爲咨商事准

貴提督咨開浙省各營兵不敷防移商增戍等緣由到本部院准此爲照浙省舊額經制兵四萬八千六百餘名分防所屬地方延袤二千餘里戍守原自單薄嗣經

議政王會議裁去三千六百名僅存四萬五千餘名而各汛分防愈不敷矣是以前部院兩敘不敷情形

合詞請益未荷

俞允今准大咨移詢誠見計謨第查從前減兵原爲節餉是就昔日無事而言今值滇省有事之時則浙江一省西北地接兩江東南界連八閩處處防禦宜嚴况海逆未靖蠢動堪虞若夫湖寇山魃亦恐乘機竊發建威消萌之法不得不早爲籌計且查各營官兵分防各縣村鎮俱已零星派撥其存城在營者寥寥無幾遇有警息固守尙慮不足征剿愈難猝應邇來各地兵單不止象紹寧衢等處卽杭協一詳言之鑿鑿可聽此後各營詳請增兵者料必接踵漸至然而今

昔時勢固已不同自當因時酌宜寧可備陳於事前
庶免貽誤於日後亟請於通省十一郡中自邊海以
至各要隘分別衝緩按地指畫極言兵不敷用情形
募營見在兵馬之外各計應添兵馬數目然後總計
通省共宜增戰守兵丁若干馬匹若干或當仍復舊
額四萬八千六百之數統祈勝算佈置周悉庶便繪
圖貼說合詞額

請相應咨商爲此合咨

貴提督煩爲查照確酌示覆施行

咨江西巡撫添兵設塘

康熙十三年三月

爲飛報事康熙十三年三月二十九日准提督塞

咨准平陽鎮咨呈爲飛報靖藩兵變事本月三十日

又據平陽蔡總兵塘報同前事等因到本部院據此

爲照閩省倡亂江右與浙屬俱爲首衝本部院見在

飛調官兵馳往常山江山等處相機堵禦仰藉鄰封

互資應援貴屬廣信乃閩屬崇安大關通衢諒

貴部院宏猷碩畫早已周防但恐建協兵力未可專

恃亟應調發一鎮率領重兵駐防以固疆圉仍祈設

立塘撥使兩省聲息不時飛遞以便策應合亟咨會

爲此密咨

貴部院煩請查照迅賜裁酌示覆施行

咨江南督撫提固防沿海

康熙十三年四月

爲緊急軍務事照得閩省倡叛構連海逆冀圖侵犯
前據浙屬文武各塘報隨經本部院一面密疏

題報一面調發滿漢官兵前赴溫衢二府閩浙交界處
所分守險要協力堵禦及飛飭沿海各鎮將整頓嚴
防并咨會

貴部院提督預設重兵屯劄交界處所互相聲援倚所在

案但查海洋由閩至浙自浙抵江皆可順帆直達隨
處可以登犯今浙境雖設法調兵堵禦而江浙實爲
唇齒誠恐賊踪飄突靡常亟宜預爲綢繆庶幾有備

無患合再密咨爲此合咨

貴

部院
提督

煩爲查照希卽飛檄江省沿海各營將加意

嚴防險要處所預撥勁兵扼守遇有賊踪登犯毋論
江浙俱勿岐視卽飭鄰汛將領互相星飛策應共固
封疆幸勿遲緩速賜示覆施行

咨覆提督調守分水仙霞二關

康熙十三年四月

爲亟請援師以固封疆事康熙十三年四月初五日
准

貴提督咨開耿逆兵變勾連海寇水陸交訐先經四次催請調發滿漢官兵堵禦浙閩交界各處要口在案今准黃巖鎮激切飛請相應立賜調發保固封疆等因到本部院准此除先准

貴提督咨移俱經節次咨覆在案所據黃巖鎮咨請前由未准大咨之先卽據該鎮具詳前來隨經本部院照會該鎮內開耿逆叛變勢必結聯海寇沿邊侵

掠浙省壤址相接亟當堵禦揆度形勢溫州密通福
寧衢州界聯浦城通途大道爲浙省門庭是以本部
院酌調平陽鎮前往分水關一帶堵禦險要而以溫
鎮應之酌調衢協往守仙霞關堵禦險要本部院見
在抽調各路官兵相機策應若賊踪乘風飄突寧台
溫處處可以登犯則似應處處增兵設防惟是浙省
經制官兵盡佈海疆內地寥寥無幾且各處山魍土
賊見在竊發無可抽調若提標勁旅見駐寧波台區
有警尙可馳赴應援本部院見在飛章

題報請發大兵赴浙不日卽有

成命該鎮忠猷懋著偉畧夙聞邊疆險汛實倚長城本部
院案所欣藉惟冀益展雄才相機籌酌聯絡鄰汛倚
角聲援務保無虞仍不時飛報情形以憑本部院隨
卽調度萬勿疎誤勉旃毋忽等因照覆在案今准前
因合再備覆爲此合咨
貴提督煩爲查照施行

咨將軍轉移副都統飛據仙霞堵禦

康熙十三年四月

爲逆藩負恩反叛難臣忍死請兵亟彰

天討速固鄰封事康熙十三年四月初七日辰時據福建
建寧府通判何源濟呈稱卑職朝

覲回閩於三月二十六日抵浦城縣民心惶惶傳說藩兵
卽至次日到回龍村口離建寧二百里三更時分忽
見署延建邵道事延平蕭知府一牌上寫爲軍務事
有王師前往浦城所過地方修整橋梁道路竟不用
我

朝年號止寫甲寅年三月二十五日自延平發及詢差役

口稱三月十五日各官設祭先娘娘藩王當卽殺官
四員一福州王知府一建寧喻同知一侯官知縣一
閩縣知縣總督撫院義不少屈俱拘禁王府但范總
督歷數其罪存亡未確是夜率兵擄掠南臺男婦驚
逃淹死無數二十四日有總統上將軍徐曾江三人
領兵三千抵延平二十七日抵建寧逼民投順方免
殺戮今將辮子截短袖口切平各戴氍帽等語職痛
心無地疾首呼天恨不血濺賊前無奈孤忠莫展左
右思惟旣無任可到與其徒死溝壑不若赴浙請兵
庶於時事有補隨於二十九日夜奔走一百二十里

平明達浦見西門外大張告示獨免錢糧內有弔民
伐罪妄語賊氣憤欲絕旋即晝夜奔過仙霞關初三
日回望賊兵前站已上楓嶺漸入浙界聲言勤王意
在直下杭州賊今千里跋涉劄輟門請兵援剿等
因到本部院據此合亟密咨爲此合咨

貴將軍煩請查照希卽迅移往衢副都統立督滿漢
官兵飛據仙霞險隘堵禦賊衆萬分緊急望勿刻遲
至切至速

咨副都統犒賞滿漢甲兵

康熙十三年四月

爲軍務事照得閩逆猖狂稱兵倡叛凡在同仇義淡
討逆

貴副都統親率滿漢將士扼險禦侮會見疆土奠安
竚望

彤弓錫爵惟茲將士用命疆場雖奏功之日

朝廷自有酬庸之典而此日撥甲枕戈本部院不勝軫念
是以特發庫帑用酬勞勩甲兵今特檄行標下中軍
副將王廷梅查照兵數約計銀兩解赴

貴副都統軍前聽候頒給并祈轉行曉諭則荷高誼

不淺矣相應咨達爲此合咨

貴副都統煩爲查照示覆施行

咨提督會商方畧

康熙十三年四月

爲緊急軍務事准

貴提督咨開調發貴標等營官兵前往分防平陽分水關又調台協等營官兵前往分防龍泉各要口堵禦緣由到本部院准此爲照閩逆倡亂浙省綢繆固圉自宜兼防海道尤當視賊鋒所專向并力堵禦屢次咨覆

貴提督就見今兵勢典籌佈置已悉縷陳無庸復贅今准大咨已發貴標并酌調近處官兵一千前往溫處二屬正與本部院咨商事宜相符淡佩碩畫但前

據塘報浦城偽檄情形頗晰賊以全勢向衢已無疑義業經三次咨請

貴提督親臨省城會商方畧至於沿海一帶各鎮皆專統一方保障之任各有責成

貴提督統衡通省今當賊兵近在交界衢屬實第一要衝形勢緊急永候台旌迅發面奉指誨庶得隨機策應保固嚴疆兵貴神速萬勿濡緩爲此密咨貴提督煩爲查照星刻命駕施行

咨提督赴省會商堵禦衢州

康熙十三年四月

爲塘報事准

貴提督咨開寧台溫實兵總算可觀分計不足此後沿海之兵一人未敢輕動等因到本部院准此爲照賊警初至之時本部院卽以衢屬形勢最急移會貴提督親統官兵亟防衝要

貴提督亦卽秣馬厲兵前軍先發元戎繼進嗣因塘報惟恐勾連海賊水陸竝宜兼顧

貴提督暫畱行旌以待瞭探確音今賊至浦城塘報情形甚晰仙霞關大路旣在萬分緊急若賊由崇安

出至常山坦途易達江西之廣信素無重兵不可倚恃此兩路實今日燃眉之勢也本部院暨

將軍撫院會議滿兵雖已前進後繼寥寥內地無兵可調而寧台溫各鎮皆有分防海道之責惟候

貴提督親統官兵先至省城會同商畧急應機宜移咨奉札再四正在永望捧接大咨俱未慮及衢屬兩路之危寇在門庭難以先計堂奧封疆事宜兵機呼吸不得不激切指陳仰祈台鑒爲此合咨

貴提督董率將士電赴星馳庶得面商方畧共保嚴疆煩爲查照迅速命駕施行

咨江甯總督調發滿兵赴浙應援

康熙十三年四月

爲緊急軍務事照得閩逆叛亂本部院屢經

題請大兵赴浙援剿案奉

上諭調撥江甯滿兵前來策應當經專差馳赴

貴部院軍前請賜督催起發在案今浙省需兵甚亟
前項滿兵猶未卽到不意又於本年四月二十三日
據浙江黃巖總兵官阿爾泰飛報內開康熙十三年
四月十七日平陽鎮兵變將蔡總兵圍擊等因前來
據此除卽刻密疏

題報外是浙省外寇未弭而內患旋作勢切燃眉見在

官兵俱有汛防堵禦之責無一可以抽調應援惟望
貴省滿兵星飛策應庶保無虞合再亟請爲此合咨
貴部院煩請查照希卽立刻移催滿兵星夜兼程赴
浙永望應援軍務萬分緊急幸勿刻遲併賜示覆施
行

咨京口將軍迅發滿漢官兵赴浙應援

康熙十三年四月

爲緊急軍務事照得閩逆叛亂本部院屢經

題請大兵援剿見經兵部咨調江寧大兵一千又防守
安慶副都統所領兵全來又江寧察所領四旗兵
全來又定南將軍和碩額駙所領兵五百名夸蘭大
二員赴浙應援等因前項官兵雖經調撥迄今無一
到浙不意又於本年四月二十三日據浙江黃巖鎮
總兵官阿爾泰飛報內開康熙十三年四月十七日
平陽鎮兵變將蔡總兵圍拏等因前來是浙省外寇
未弭而內患旋作勢切燃眉目今見在官兵俱有汛

防堵禦之責無一可以抽調應援所有部撥滿兵又未卽到本部院再三籌畫特又密疏

題明先請

貴將軍就近酌發滿漢官兵星飛赴浙除現備小揭塵覽外第軍機呼吸若候部覆奉

旨方行起發勢必有誤合亟咨請爲此合咨

貴將軍煩請查照立刻調發滿漢官兵星夜兼程赴浙應援以固鄰封併祈先將調撥官兵數目起行日期預行咨示以便備辦供應望勿刻遲

咨巡撫撥發官兵防守埭頭

康熙十三年五月

爲揆報事據分守杭嘉湖道詳稱四月二十六日據差去快手沈錫俞禮筭稟稱錫等蒙差往歸安所屬廟喜等處地方揆聽土賊信息今揆得十八日有盜首李成龍卽李振海等從廟喜進山往埭頭一帶錫等隨往埭頭鎮打聽鎮上百姓慌張說離鎮二十里山內賊首李成龍楊相嘯聚三百餘人往來擾害鎮上無兵汛守恐早晚來鎮搶掠等語除密移協守羅副將防剿外該本道看得湖屬山攢水繞向爲寇盜出沒之藪今聞變震鄰汛兵抽調一切不軌之徒糾

結匪類紛紛蠢動見據報稱賊首李成龍等嘯聚三百餘人逼近埭頭將欲搶劫鎮民湖協一營除奉調撥外僅存兵三百餘名分防州縣城池庫獄不能分撥進剿合無上請憲臺或於憲標或於撫標暫撥標弁帶兵一百名防守埭頭安慰民心等因到本部院據此爲照湖郡半屬山陬半聯水滙最易藏奸今鄰封震警而不逞之徒乘機竊發以致百姓張皇該道詳請撥發標兵駐防埭頭誠屬急務但本部院標下二營官兵先經兩次調撥赴衛防剿今本部院現在會同平南將軍統兵進剿其存營官兵勢難再爲抽

調然湖郡需兵亦難緩視似應於貴標酌發官兵一
百名前往埭頭防守擬合咨商爲此合咨
貴部院煩請裁覆施行

密咨福建海澄公提督

康熙十三年五月

爲欽奉

上諭事准兵部密咨內開康熙十三年四月二十四日奉
上諭耿精忠反叛海澄公黃梧提督王進功隔越泉州漳
州與浙江聲息不通着行廣東王及總督巡撫江西巡
撫浙江將軍總督等由廣東江西設法差人於黃梧王
進功處確探消息若海澄公黃梧提督王進功等能各
守地方着令固守若力單不能自守廣東江西有何處
可來會合着來會合欽此合咨貴部院煩爲欽遵施行
等因到本部院准此爲照逆賊耿精忠背負

國恩稱兵造亂本部院聞變之日卽知

貴爵提督忠義憤激惟因境阻軍書無由遽達今我

皇上明見萬里特頒

上諭指授機宜此皆

貴爵提督丹誠昭格簡在

帝心佇見不世勲名傳榮千載今平南將軍賴 統率禁
旅十萬指日直抵福州本部院欽遵

睿謨問道馳使密咨

貴爵提督請煩查照欽遵

上諭事理相機酌裁迅賜示覆施行

咨提督統兵赴援瑞安

康熙十三年五月

爲飛報事據溫州鎮飛報內稱康熙十三年五月初二日午時據瑞安營副將吳三畏飛報平陽南岸叛逆於康熙十三年五月初一日點兵帳房加至五百餘頂其人馬俱抵中洲連夜搬運砲械馬跳版等項喊聲不絕本職會同提標劉遊擊分撥兵馬在上下兩處阻截初二日賊盡拔營俱向中洲周村落船辰巳等時卽已渡江而浦口南岸船隻亦已起蓬撐駕往上意在水陸竝進但本汛節蒙本鎮撥兵添防似此賊勢重大終虞杯水車薪本職等惟有盡命堅守

倘荷發大師尾賊之後攻擊於外而城內官兵堵剿於內自然一可當十瑞邑保全全浙均叨利賴矣仍懇憲臺賜文通報亟請救援等情同時又據提標遊擊劉國珍報同前情又據瑞安營副將吳三畏報稱平陽叛兵勾引閩寇二萬有奇於初二日辰巳時渡江已到我岸雲集蜂擁屯劄橫山等處分布攻擊見在會同提標劉遊擊分發官兵迎敵等情各到職據此爲照平陽官兵叛變勾逞逆勢緊急瑞安之危如同累卵夫瑞安爲東甌離落萬一挫失勢必逼犯郡城水陸交侵腹背受敵鎮標之兵除已先調發往瑞

應援外所在之兵有限今本職於據報間立發溫州
城守副將楊春芳鎮標左營遊擊魏萬侯各帶領馬
步兵二百名又檄調樂清營千總一員把總一員磐
石營千總一員把總一員大荆營千總一員把總一
員各帶馬步兵二百名星馳應援又檄調寧村營千
總一員帶兵於該汛援瑞安一帶聯絡救應但我兵
已在單弱之時又經調發郡城根本水陸重大亟請
憲臺賜發救兵解此危急本職再爲籌思若待援兵
不免稽延時日於是專咨黃巖鎮火速先發援師拯
我鄰難惟恐彼處推阻尤祈本部院星檄黃巖鎮聞

聲踵救全浙幸甚等因到本部院據此爲照平陽叛
弁勾引逆賊輒敢擁衆渡江恐有狡謀陰合今瑞安
孤城吳副將悉力拒守如此一心報

國奮不顧身誠爲可敬若棄置不援何以勵忠義之士
且溫郡倘有他虞西犯金處東逼台寧在在可虞今
溫屬萬分危急滿兵尙俟馬到前進必藉台旌迅發
庶可保固封疆合亟咨會爲此合咨
貴提督煩爲查照卽日統兵進援施行

咨催提督統兵赴瑞

康熙十三年五月

爲飛報事康熙十三年五月十二日據溫州鎮塘報
內開康熙十三年五月初三日午時據溫州城守副
將楊春芳本標左營遊擊魏萬侯報稱卑職等帶領
官兵至南慈湖安營於初三日寅時發兵前進路遇
鄉民攜婦女數百人北來審問賊人情形口稱賊有
萬餘兩路進發一路在瑞安東山塔下營一路游上
渡北來等情本日酉時又據該副將報稱卑職等領
兵前往瑞安應援於初三日巳時到瑞安三都焚燬
地方據撥兵王有福等報稱撥至三都嶺下見鄉民

紛紛逃竄嶺上俱是賊兵擺列大砲佔踞險隘不能前進等語卑職等見在鼓勵官兵征進等情到本職惟祈憲臺亟發援師共圖殲滅等因到本部院據此爲照瑞安被賊攻圍勢在危急先經咨移

貴提督就近赴援諒必慮切巖疆星馳進發今據塘報各營援兵屯劄紫巖地方尙未直抵瑞城夾擊何能立解重圍各營將領無所統轄號令參差議論不一恐其躊躇瞻顧必致有誤大事今本部院見同平南將軍統兵前往金衢一帶惟藉

貴提督台旌迅發以援危城合亟咨會煩爲查照施行

咨催提督赴甌

康熙十三年五月

爲泣請援師以救危疆事據分巡溫處道飛報稱溫處爲山海僻隅值閩逆變叛防弁倡逆甌城致平陽秦順相繼湮沒瑞安受困半月郡城之外海鯨聯帆游移官民露處城隈慶景已爲賊踞雲遂各邑警息不絕郡城危同累卵本道飛請援兵已十有三次今於本月十六日酉刻接憲臺劄諭以公議提督臨甌視師撥狼山官兵五百員名到瑞援剿兩郡賊勢浩大危在旦夕日間提督統師卽至而馬牌尙未到甌吳副將竭力死守忠貫天日瑞民亦百計捍圍以待

援師倘望救不至一旦瓦解是孤忠義之心而絕城
守之念也伏乞憲臺迅賜檄發勁旅并催提臺早統
雄師星夜前進以救孤危等因到本部院據此爲照
瑞安圍困二旬賊踪直犯甌江前准大咨親統官兵
赴溫援剿計今諒已抵溫但屢據該鎮道疾呼請救
今復據該道澈切籲催前來合亟咨達
貴提督煩爲查照如台產業已抵溫希將到溫日期
示覆以慰翹望倘尚未抵甌祈卽迅督官兵刻日星
飛前赴以救危疆幸勿刻遲至望至切

咨覆提督調發官兵

康熙十三年五月

爲泣請援兵亟救孤危等事准

貴提督咨開賊困瑞安危急前後調發官兵六千五百有餘赴溫瑞援剿寧台兵力單薄煩請迅催江南抵浙滿漢官兵一從金處上游星赴溫州夾剿一往台州一往定海聯絡備禦緣由到本部院准此爲照瑞安被困業荷

貴提督統率官兵親赴調度計算赴援官兵前後調集六千五百餘員名兵力不爲不厚今准大咨復請滿漢官兵赴溫夾剿但會商平南將軍公議抵浙滿

兵馬力未齊不便零星四應溫州一路全藉

貴提督策勵官兵奮勇撲剿刻期殲滅至於台寧沿海一帶本部院熟籌再四浙省官兵多在溫台寧三府今處屬數邑失守衢屬餉道幾致中梗何等危急無兵調遣是以前又備敘情形會列台銜特疏上請或發江南和碩額駙所統滿漢官兵或發江南一鎮赴浙策應在案兵部見又調撥揚威將軍處所副都統喇哈及包衣佐領下官兵赴浙策應諒可不日抵浙統俟到日會商分發策應合就咨覆煩爲查照施行

咨覆巡撫酌籌大兵糧餉

康熙十三年六月

爲請留鹽課銀兩等事准

貴部院咨商部覆浙省錢糧已多題請協濟發帑俱
不准行煩請酌籌示覆以便補贖會

題緣由到本部院准此爲照用兵之際糧餉爲先目今
各省俱有大兵進發若浙省可以足用豈敢屢疏請
請但部議所計者以通省一年徵解之數總算作見在銀
兩而督撫身在地方既不敢緩誤軍需又不敢亟竭
民力其事勢實有萬難者今本省原額兵餉大兵糧
餉駐防官兵加餉綠旗官兵行糧已前支給之數并

將來月給之數皆可按籍而稽其餘備辦槽餉僱募夫船添增驛站等項種種皆需現銀至於豆草日用浩繁雖按時支放必須先期採辦非可緩待而溫處衛三郡近賊地方人民逃避見在竭力招徠寧台三郡額徵本少海寇告警人不寧居金嚴二郡就近供應衛屬且爲兵馬孔道力役困苦此數處雖迫以追呼終無實濟所藉惟杭紹嘉湖四府又值二麥無收蠶桑失望且今時方六月其先解并備辦豆草等項約已盡額徵之六七惟以軍需緊急不敢爲民告難若取必一時概行敲扑使人心搖動則事勢可虞此

等情形身當責任者安得不早計乎惟

貴部院與藩司熟籌將已經支給并見今實需之數約畧可以徵解接濟之數通盤打算如可竭蹶支撐且不必再疏上陳若司帑空虛萬難供應則必將各項實用數目明白簡易具詳

貴部院再加裁酌會疏入

告亦不得不然之勢耳相應咨覆煩請查照施行

咨巡撫催解草料

康熙十三年六月

為料草催解不前馬匹枵腹難待專員再懇亟催飛
運事照得在衛滿漢綠旗官兵馬匹豆草全無缺飼
已踰數日睹此情形甚為憂迫是以三次咨請

貴部院迅督輓輸接濟迄今又復數日總無顆粒寸
莖解至各官兵朝夕環訴而該道府無米難炊徒嗟
束手軍興何等緊急豈藩司以一派解詳報之文移
便可弛擔耶查該司前詳省運米豆屈指一月杳無
片艘到衛各府報解多屬空文亦未見該司將遲誤
各官揭報似此藐玩軍需何賴本部院統兵行間糧

草軍需惟藉

貴部院籌畫接濟業已屢次咨催今事切燃眉不得
不再專差咨請爲此合咨

貴部院煩請查照立刻嚴督藩司將貯省料豆草束
已起解者添差沿途催趕未起解者督令該司親赴
倉棧料理上船遶差能員飛解赴衢并遶委監司一
員駐劄嚴州專司催趲毋恃微員以致誤事至各府
派辦豆草等項定限守催隨到隨卽陸續迅速接濟
引領永候并祈先賜示覆以慰寬望至緊至切

咨覆巡撫已發龍游防剿官兵

康熙十二年六月

爲稟報事准

貴部院咨開僞逆馬千總突犯龍游勢甚詭悍煩請就近會酌迅發官兵進剿緣由到本部院准此爲照僞逆突犯龍游本部院於途次聞報卽發隨帶官兵令杭協副將陳世凱江南提標遊擊崔天福統領駐劄該縣相機防剿兼顧蘭湯二縣外今准前因合就咨覆煩請查照施行

咨覆將軍巡撫已發援處官兵

康熙十三年六月

爲會商機務事准

貴將軍會咨內開處屬十邑大半失守賊勢猖獗逼

近郡城亟請會商

平南將軍再調勁旅速發處州以除急患狼山鎮標官兵五百名速令回處餘再別處抽調一二千名分頭征進方克濟事又來省滿師將次進發原調金嚴嘉湖等處官兵亦當酌量撤回以爲地方防守之計統祈酌籌指示緣由到本部院准此爲照處郡報警本部院途次龍游卽已調撥遊擊于昌祐統領各標

營官兵會同處協副將姜騰蛟相機策應援勦嗣據塘報龍慶遂昌等縣相繼失守青田告急復又咨移提督并照會黃巖鎮調發該鎮親統官兵二千餘員名星赴處州前後夾勦俱經咨達在案及狼山鎮標官兵五百名未准大咨之前本部院業已檄令畱處策應是處州一郡除原額經制之外前後已調撥過各營官兵約計三千五百六十餘員名矣至於原調金嚴嘉湖等處官兵共計不過二千一百餘員名防守常開等邑今逆賊數萬盤踞清湖相拒咫尺現今常開各邑俱有賊眾侵犯龍游警息頻聞業發杭協

副將陳世凱統領該營官兵及江南提標官兵駐龍
進勦見今又發湖協官兵二百名赴常策應惟存官
兵二千有餘在郡隨本部院進勦若再撤回金嚴嘉
湖調防之兵不惟本部院勢難單騎前進并常山開
化龍游亦無一兵防守仰藉

貴將軍部院垂念嚴疆亟賜調兵星速赴衢分防庶便撤
回前項官兵合亟咨覆煩請查照施行

咨江西督撫提督會剿蛟界賊寇

康熙十三年六月

爲鄰界寇警交託亟咨調兵策應共衛封疆事爲照
浙省常山開化等處與江省接壤先經移咨

責部院

提督亟發重兵固守廣信玉山鉛山等處已准大

咨示覆在案不意叛賊柯昇擁兵從逆玉山一帶賊
兵盤踞聲息斷絕而永豐等處賊首詹三公子等嘯
聚夥黨流突浙境常開之間土寇附合時時窺犯今
浙省雖見在發兵搜勦而兵至之時賊蹤又復寂然
總因交界叢山易於出沒非兩面夾剿此搜彼遁終
難靖盡根株

貴部院提督 誼切同舟自當有碩畫指授亟奏蕩平今屢

據塘報緊急合亟咨會爲此合咨

貴部院提督 祈卽迅發官兵搜勦仍刻期示覆以便約會

策應施行

咨覆提督援台事宜

康熙十三年六月

爲亟請援兵以保封疆事康熙十三年六月二十四日准

貴提督咨移太平失守亟請立發杭州養馬大兵盡往台州緣由到本部院准此爲照溫鎮叛變賊寇勢必侵犯台郡先經本部院會商平南將軍將駐杭滿兵請發赴台應援見准將軍圖咨移已調副都統馬所帶馬兵并察哈力兵共四百一十九名又將安南將軍華奉

旨所撥看守杭城兵五百名又將杭州兵添補八十六名

共合一千委副都統阿 爲兵主星夜赴台應援等
因又准撫部院咨移前項赴台滿兵已於十九日起
行諒月內自可到台可藉防禦惟是金華賊又逼犯
是以先將在杭在衛滿兵分路援剿今常山又陷將
見雅副都統兵馬仍撤回衛其台州今日事勢惟藉
貴提督就近兼顧以保無虞今見准兵部咨調江寧
右翼查哈喇全軍及壽佐領甲兵一名令副都統吉
爾塔布統領赴浙應援除經一面咨移江南督院迅
催前項調發滿兵星夜赴浙外今准前因合亟咨覆
煩爲查照施行

咨商巡撫發兵援嚴

康熙十三年七月

爲咨商亟救嚴屬以固糧餉重地事照得全浙大勢以衢溫處三郡爲門戶溫處相繼變叛惟衢州尚有當衝扼要之勢賊亦以全力相抵而金華爲居中要道防禦不得不亟今滿兵在衢止有一千六百餘甲在金不及一千非有餘力以四應至調集綠旗官兵共六千有餘常山一千扶傷而回開化四百尚不知下落防守龍游五百湯溪三百蘭谿五百金華一千一百存衢城者僅及二千晝夜環甲以當數萬之賊而土寇在在竊發警報踵至本部院應接不暇今遂

安賊衆攻逼嚴郡存兵數不及百岌岌可危若嚴郡有失則省城震動餉道中絕萬難緩視柰清湖賊兵連營漸進如再將此二千之兵分調赴援則衢州守禦更無可恃全省兵馬之任本部院與提督共之今台黃告急如此東路援師不可望矣思省城兵亦無多但嚴州爲省城之屏蔽仰祈

貴部院於貴標發兵數百赴嚴協同鮑副將相機勦禦此亦萬不得已之著目前事勢不得不急治其標耳迫切燃眉專員馳請爲此合咨

貴部院煩請查照迅賜調發并希示覆施行

咨覆巡撫各路援兵難撤

康熙十三年七月

為機務事康熙十三年七月十三日准

貴部院咨移金嚴各屬告警嚴州已發標兵五百名前赴防勦金華逼近諸暨為杭紹通衢可否將原調赴衢官兵撤回緣由到本部院准此為照賊兵四面侵犯衢州連營四十餘里實有數萬之眾滿漢綠旗官兵共三千有餘於七月初七日出城奮勇衝擊而賊營外掘濠濠內設木城火器排列相繼迭發猝難攻破自龍游以至湯溪無處非賊兵分佈勢甚猖獗忽於七月初十夜拔營遁去恐有狡謀連發官兵漸

進哨撥一面先調官兵往龍游湯溪沿河一帶進剿以通運道今俟沿河清蕩卽當先復東義以固紹興之西路台屬仙居賊方攻破西門幸援兵適至遂得保全嚴屬兵單慮之已久惟因在衢之兵業已四往分防再難調發止令金協兵百餘前往今貴標兵旣發稍可恃以防禦紹屬見調之兵勢不能撤回貴部院令其酌將臺寨官兵回郡此亦權宜緩急不得不然今惟有意爲金屬收拾之著卽所以保固紹屬專待龍湯一帶進剿回報至日酌行但衢郡兵勢實單前日情形萬分危急將軍已疏

請喇吉二副都統之兵齊赴金衢祈

貴部院與

總理部堂達

將軍圖 迅爲商發庶戰守有藉耳相應咨覆煩請
查照施行

咨覆提督滿師仍駐金華

康熙十三年七月

爲飛商緩急情形事准

貴提督咨開駐防金華副都統

馬雅

俱准部文回省

未識因何調回必需剖悉形勢立疏

題明挽回保固金華等因到本部院准此爲照浙省形

勢自溫處叛變而後金華實爲東浙藩籬水陸交衝

運糧孔道

馬雅

二副都統領兵駐守一戰勝賊卽准部

文調回省城本部院隨會商平南將軍已經調發在

衢副都統吳

星赴金郡彈壓適逆賊擁衆逼城滿

漢官兵協力蕩勦接據塘報大捷隨卽具疏上

聞業有小揭移覽見今馬副都統又復至金防守自可無庸題明照准前因擬合咨覆煩爲查照施行

咨督餉侍郎巡撫籌酌運糧船隻

康熙十三年八月

爲咨商立法預備運糧船隻以濟緊急軍需事竊照
大兵進剿首在糧餉輓運接濟必資船隻今駐衛滿
漢兵馬所需糧料缺給日久本部院差檄頻催陸續
前來不過寥寥數艘矧今和碩

康親王總統大兵征閩將來糧料需用正殷其運糧船
隻若不亟籌良法即使儲備有餘而無船載渡勢必
遲誤查自省城以至嚴州江港稍寬大船可以行使
驛傳項下原有額設座站等船七十餘隻見在江干
於內量畱十餘隻以應大差其餘俱令往來杭嚴裝

運糧料并再搜尋寬大航漁等船二百隻并四十隻
編爲一號互相保結連泊江干遇有糧料隨到隨裝
其自嚴以至衢州溪流狹小水淺灘高重大船隻難
以行使前委糧道駐劄嚴州責司催督應令搜備小
船四百隻亦每四十隻編爲一號互相保結連泊嚴
州馬頭一遇省城解到糧料隨卽轉撥裝載其省城
嚴州各船俱照民間僱價現給紋銀不許官役短少
遲延致使船戶苦累起行運載之時除解官外俱另
選或府佐或三司首領官一員多帶幹役專司管押
船隻往回并沿途催備人夫以資運往如有沿途船

隻潛避立着互結各船催追倘通同故縱任其脫逃
互結船戶一體究懲抑船官役分別叅處至編號各
船止許裝運糧料凡一應差使等項概不得擅行動
用至有奸猾船戶躲藏徽州河路藉口隔省規避似
應就近移明江省地方官徑行拘拏如是庶船隻不
致缺少爾軍需或可無誤耳除行藩司暨糧驛二道
酌議外是否可行擬合咨商爲此合咨
貴部

堂院

煩請查照會奪仍希見覆施行

咨巡撫留兵協防嚴屬

康熙十三年八月

爲請兵添防保固地方事據嚴協副將鮑虎詳稱照得淳遂壽三縣前因土寇糾集開常餘逆乘我兵單節次襲陷界職於七月十五日親統官兵前往恢勦七月十六日恢復壽昌二十三日恢復淳安八月初三日恢復遂安半月之間連復三城壽遂二邑雖有城郭多倒塌不堪而淳安蕪城俱在萬山之中界職血戰二十餘陣跑倒坐馬二十餘匹始克底定今遂安賊寇散而復聚界職現又督兵進剿因思新復地方必須多著官兵防守今本營之兵除畱守府城并

分防桐分二縣外其餘隨帶只有四百餘人先畱一百五十名防守壽昌又畱一百五十名防守淳安現今界職隨身所帶之兵寥寥無幾卽全畱在遂尚不能資戰守况今淳安賊首劉萬冲復聚逃散之賊出沒於靈岐富昌窺伺分水恐一時難盡根株伏乞本部院垂鑒恢復三邑兵單難守不論何營之兵酌撥數百前來添防庶疆圉可保事干軍機至急理合詳請等因到本部院據此除詳批該營缺額并貼防太平兵數仰速行募補撫標官兵暫畱協同防勦俟官兵調齊再行酌議仍候咨明

撫部院去後爲照嚴州失陷屬邑該副將力戰恢復
見在分兵防守但隨帶官兵既欲隨軍征勦又欲分
防守禦自是不敷既經該副將詳請增兵前來除批
令該副將遵照將貴標官兵暫畱協同防勦外擬合
咨明爲此合咨

貴部院煩請查照施行

咨江南總督查取韓斌家屬

康熙十四年十二月

爲咨提僞官家屬取信投誠以解賊黨事照得逆賊耿精忠造亂閩疆迫脅官兵勾合土寇竊踞仙霞妄思狂逞本部院親行統師會同滿漢官兵在衢進剿屢加撲殺惟是逆賊依險負固冀圖苟延殘喘且附從黨羽實繁有徒所以百足未僵尚稽

天討今荷

皇恩浩蕩矜憫脅從准令投誠本部院見在勦撫竝用茲據投誠人章啓元供稱係江南亳州人氏因耿逆殘忍刻薄官兵多係離心是以前來投誠又供亳州人

韓斌係福建興化府城守營守備在仙霞關一路賊營帶領八百人意欲投順聞賊營傳說韓斌家已被抄所以尚不敢來若取其家人到此差發過去當卽全營來投等語又據獲犯李斌稟稱寇營都司韓斌係我

清朝武進士原任興化府城守中軍守備年方三十有五被耿逆迫脅將部下官兵五百名領入衢地毒念君恩輒卽流涕一載有餘向無登陣見今衣號只掛興化城守都司韓七字詢及家眷稱在江南家有父母妻子計百餘口窺其衷腸實有歸誠之念若查取其父

于兄弟一人密到衢州潛通消息大則可以內應外合其屠叛逆小則可以招其投誠等情據此則韓斌有心向化相應取其家屬往招惟希

貴部院轉行該地方官將原福建興化府城守管守備韓斌家內選取的屬親丁一名賜文移解過院以便設法招諭俾其傾心來歸用彰

朝廷寬大之德以解逆賊煽誘之謀擬合咨會爲此密咨貴部院煩請查照迅賜轉行查取移示施行

咨提督犒賞官兵

康熙十五年二月

爲軍務事照得逆賊負固甌城官兵攻剿用命本部
院漢爲軫念今接據各鎮將塘報於二月十七日大
創賊氛此皆

貝子威武暨

貴提督帷籌之所致也會見疆土奠安蕩平當在指
日矣雖奏捷錄功

朝廷自有酬庸之典惟茲將士血戰宣勞本部院不勝嘉
予酌備銀三百兩專員齎送所

貴提督分給在事有功將士聊爲牛酒之需相應咨

達爲此合咨

貴提督煩爲查照施行

咨會福建總督發兵赴常夾剿

康熙十五年三月

為咨會調發官兵以資恢剿事照得開化一邑界接徽饒路通廣信逆賊偽都督馬鵬偽總兵周立等與衢郡河西之寇互相聯絡本部院擬由嚴遂進兵則常山唇亡齒寒自不難於克復可以會合廣信大兵是以調發署瑞安營副將事叅將武榮平陽鎮標遊擊陳國任帶領在衢官兵赴嚴會同嚴協副將洪起元等官兵及調援在嚴撫標官兵協力進取業將開化克復抄其後路若再得勁旅由衢直抵常山兩下夾剿賊必首尾莫應惟因在衢官兵現已分發由嚴

進取開化且衛郡河西逆賊刻刻對壘我兵防守要
汛保衛城池處處皆宜嚴密卽克復常山又必屯兵
戍守方爲萬全衛郡官兵未能分佈當此賊勢披靡
正可乘時進取得荷

貴部院宏籌偉畫督發貴標勁旅或鎮標官兵前赴
夾勦則常山一邑不難立奏蕩平矣除經具啓
親王外擬合咨請煩請查照施行

咨江南總督知照韓斌原籍

康熙十五年四月

爲懇恩移咨知照事據標下隨征副將韓斌呈稱竊
照卑職係江南鳳陽府亳州人中辛丑科二甲第一
名武進士於康熙十年間選授福建興化城守中軍
守備康熙十三年三月十五日耿逆叛變時職在省
領餉隨被細鄉禁錮逆府彼時恨不欲生無奈孤掌
難鳴後逆衆出兵來衢卑職帶領親丁隨從久欲投
奔前來柰賊衆疑忌防範嚴切只得苟延歲月幸蒙
憲恩提取職子韓世晉僕人苑亮王爵到衢於今四
月初九日遣發苑亮前赴賊營暗通信息卑職卽於

十二日帶領都司王得功施虎把總蘇起袁宗畢思
臣張玉披甲隨帶什物騎坐馬驟憤不顧身飛奔渡
河賊衆發兵追趕幸賴憲天遣發兵馬接應卑職得
見天日隨蒙啓送

親王俱蒙賞給劄付恩同再造誓必竭力報効滅此叛
逆上報

國恩下舒積憤竊思前蒙憲天提取職子韓世晉現住
在衢今令回籍伏乞賞咨

江南總督部院并行原籍亳州知照淡爲恩便等情
到本部院據此爲照韓斌失陷賊地久欲自拔來歸

前請

貴部院查取伊子韓世晉到衢遣僕苑亮往招而該將卽率領僞官飛騎歸誠其忠勇之槩誠可嘉尚隨經本部院啓送

親王當蒙頒給副將劄付發標効用并卽具疏

題報除另備小揭呈覽外今該將遣子世晉回籍呈請移咨知照前來相應據以咨達爲此合咨

貴部院煩請查照希卽轉行該將原籍地方官一體知照俾無內顧得令盡力疆場感佩舟誼不淺矣

咨江西督撫發兵夾擊潰賊

康熙十五年八月

爲移會恢勦大捷亟請夾擊共靖逆氛事照得浙閩與江右連壤自耿逆變叛以來兩省郡邑多被荼毒如僞驍騎將軍馬九玉盤踞衢郡河西竊佔江常等處今康熙十五年八月十四日

奉命大將軍和碩康親王駕臨衢郡本部院密啓情形於本月十五十六等日隨奉

諭令調遣滿漢綠旗官兵分路勦殺河西逆賊大敗鼠黨營壘盡被我兵焚燬本月十七日恢復江山十八日恢復常山賊勢被靡潰遁我兵已抵仙霞一路

直逼玉山馬逆敗殘餘衆必奔永豐等處以冀緩死
若

貴部院撥發官兵乘機夾擊渠魁不難投首更祈
籌調遣官兵竟取閩境俾逆孽首尾受制諒可立奏
蕩平合亟密咨爲此合咨

貴部院煩請查照亟賜調度仍祈將逆敗情形併於
某路進兵不時移示以便會勦施行

咨督餉侍郎巡撫調兵至衢

康熙十五年八月

爲移會調發官兵事照得衢屬逆賊敗遁官兵追逐進聞今江常開化各邑新經恢復山鄉村落伏莽未靖且僞驍騎馬九玉等竄入廣信見據揆報搜取民間農具打造器械而德興永豐二渡關諸處綿亘數百里尚有逆賊盤踞各隘切近衢境茲雖賊氣消沮不無隱憂况地方初復人民甫定未免時懷風鶴兼之

王師深入閩疆衢屬又爲糧運咽喉思患預防更宜早計查衢州原調湖協官兵六百名之內有該協將弁

帶歸本營及事故等項約共缺兵二百名公檄該副
將照數撥補并調太湖營官兵三百名來衢分發添
防以圖善後以保萬全相應咨會爲此合咨

貴部堂煩請查照施行

咨江南督撫發兵分路剿賊

康熙十五年八月

為咨請乘時剿撫早殄逆氛事照得

王師進剿連克開常奪關入閩兩經咨達

貴部院在案茲開化各賊亦復聞風奔遁浙省衢屬業已廓清閩粵險要既失自必喪膽近據揆報僞驍騎馬九玉等竄入江西廣信搜取農具打造軍器玉山係屬空城等語是此際賊衆敗竄驚魂未定卽前此四出黨羽亦必奔顧巢穴乘此督發官兵分路進剿廣布招徠當卽瓦解本部院一面咨會

江西督撫二院訂期夾擊但江省徽州毗聯浙西江

右恐逆賊勢窮奔突必期彼此堵剿庶可早靖根株
祈

貴部院再行就近會同

江西督撫二院并飭徽州一帶鄰汛將領整肅嚴防
相機夾剿合亟密咨

貴部院煩請查照亟賜示覆施行

咨江西督撫委員整理新復地方

康熙十五年十一月

爲亟請整理殘疆共圖鞏固事照得江浙聯壤勢同
肩齒而廣信一郡更爲切近今僞襄武將軍黃朝用
嚮化歸順已赴閩省和碩

康親王軍前投誠一郡七縣復入版圖前奉

王諭速發文武官員前往接管料理撫綏地方接汛防
禦等因本部院業卽星移

貴部院在案但廣信雖復而江右餘寇尙未悉平若
不亟議綢繆恐致復生意外況該府淪陷日久甫定
殘疆亟須安集流離掃清伏莽本部院誼切同舟合

再專員咨請除玉山縣知縣事務業經本部院委令
張偉烈前赴署理移達外其一郡各縣統乞

貴部院再賜迅檄文武各官星飛分赴接管料理平
定地方防禦要隘以期安堵卽浙省開常亦藉庇鄰
輝無既矣爲此合咨

貴部院煩請查照速賜示覆施行

咨會將軍禁旗兵攜帶難民婦女

康熙十六年二月

爲嚴禁潛攜難婦他往特飭稽查事照得出征官兵攜帶難民婦女自應亟查完聚近因縉雲諸暨等縣難民陶人麟金允升等赴京奔控給還准有部文移咨本部院見行按察司彙詳定奪在案頃據該司具詳多有旗兵潛攜北上

貴將軍統領滿漢鎮守兩浙恤兵愛民原無岐視滿旗官兵必藉

貴將軍再行會飭庶幾知所凜惕擬合咨會爲此合咨

貴將軍煩請查照傳令各旗并賜示各門嚴行禁飭
使窮黎骨肉得以完聚

朝廷戶口得以安全感藉舟楫非淺鮮矣仍祈示覆施行

咨覆將軍再諭旗兵給還難民子女

康熙十六年三月

爲咨明事准

貴將軍咨開難民被擄子女當此殘黎極窮極苦之時焉能不亟拯救今准移會張哲芬毛天德等細加捧釋不忍見聞但備價取贖一項今如僅有錢數千銀數兩而欲備贖妻女子婦技之價數懸殊本將軍欲令民照數備贖則責民無點石之金卽短價勒兵俾令完聚恐他日出兵誰爲効死用命要在兵民兩不交病均希貴部院酌奪等因到本部院准此爲照難民妻女被擄一案准捧釋大咨以殘黎極窮極苦

亟宜拯救此誠

貴將軍仁慈替被爲

國爲民卽所以爲兵也本部院忝任地方之責兵以衛民原無岐視但案准部文內開真正賊寇未必攜帶妻子而行嗣後殺賊之餘賊寇所攜難民子女許令民間認領不許妄行搶擄奉有依議速行之

旨欽遵在案是以本部院遵

旨移查給還且今變叛之徒勢窮來歸尚得保全妻子獨此被陷人口反致骨肉生離誠如大咨所云不忍見聞者也近准部文據難民呈詞咨移本部院確查完

結如有難以完結情由另行報部再議等語惟有仰
藉

貴將軍德威開諭旗兵仰遵

恩旨庶可完結至各難民貧窮徹骨沿途拜跪募有微貲
安能盡如所索之數且掠帶子女豈有定價似此難
結情由未便報部仍祈

貴將軍鴻慈酌裁多方拯救推廣

皇仁庶俾新復殘疆得有起色相應移覆爲此合咨

貴將軍煩請查照施行

咨覆水師提督湖頭渡哨船

康熙十六年十一月

爲遵例請修哨船以防游疆事准

貴提督咨開據寧紹道咨呈前事爲照湖頭乃象山洋面案奉部文以寧波湖頭逼近大洋駕船出關操演不便准行奉

旨依議欽遵在案查湖頭向爲賊船往來之所槩船非戰
勦之具卽未奉部禁亦不便住泊於此不識當日何
所議而借名哨船致費金錢也今據該道來文補造
哨船十隻俱已交發該營捕盜收管仍泊方橋內江
取具收管見在不知該營是何標營捕盜是何名姓

此船作何調用况不便於出勦既未預聞本提督是
可不必議及惟名曰哨船誠恐後日大部議以水師
之事則本提督亦有責成不得不將此燕裨戰勦并
未有報聞情由咨明貴部院存案等因到本部院准
此爲照湖頭渡設立哨船案於康熙十年間前部院
巡歷沿海更定管制以象山與大嵩所相對其中爲
湖頭渡此內有寧波奉化鄞縣汛地當日止於江岸
延袤曲折設立臺寨官兵防守其湖頭渡未經設兵
故於南岸象山北岸大嵩各設哨船十隻扼要防守
以之外禦寇警內杜誘越將以內臺寨官兵裁減爲

各處改水爲陸之用久經

題准部覆奉

旨欽遵在案嗣因修葺屆期是以本部院照例

題請亦經部覆時因閩省變亂游洋賊艘飄聚不時前
修船隻恐有疎虞經寧紹道議詳泊於內地本部院
因時酌宜隨經批允擬俟戰船出洋之時駕赴巡防
況當日

題設哨船經督撫提鎮會議實有裨於防剿今部議不
准出關操演原指遠出洋面而言非以舊設巡防之
哨船槩置不用也今准前因合就各覆煩爲查照施

行

李文襄公別錄卷二終